

alia, sed aliter revertentur: imò demonstrat aliud esse demutationem, aliud perditionem; per illam non naturam sed conditionem reformandam. Postremò Christianorum & Ethnicorum eandem esse resurrectionem docens tradit, vitâ à necessitatibus jam liberatâ, membra quoq; liberatum iri, sed tamen necessaria futura. In summâ, colligit carnem resurrecturam & omnem, & ipsam, & integram. *Ceterum in editione Francisci Junii Biturigis & in Academiâ Leidensi Professoris, quam ex Jacobi Pamelii editione concinnavit, prolixius, sed & distinctius habetur argumentum ad singula capita, quorum LXIII. numerantur, curiosè accommodatum, quod nolo heic, nisi ex occasione, transcribere atq; adnotare: Nec suspicor quidem vitio mihi vorsum iri, si quadam ex ipso huc adduxero Tertulliano, meoque inseruero contextui, quam notissimum sit augustissimum Patrum Aurel. Augustinum ipsa etiam Bb. Cypriani & Ambrosii verba suis Commentariis inseruisse, uti inter alia docent libb. de Doctrinâ Christ. Si hæc Præceptor, quid ego minimus ipsius discipulus?*

Aureo planè apophthegmate librū Tertullianus orditur, Fiducia Christianorum, resurrectio mortuorum, quo certè breviter & nervosè complecti voluit ea omnia, quæ Paullus noster habet in decimo & quinto sua ad Corinthios prioris capite, versiculis à tertio decimo usq; ad vicimum. Simul etiam acutè refellit vulgus Gentilium, quod impensissimo esculentorum officio defunctis parentent, quos tamen superesse post mortem negent, & sic existiment desiderare, quos negent sentire, quosq; prius atrocissimè exusserint, postmodum gulosissimè nutrire soleant. Tantam autem esse tamq; necessariam Resurrectionis veritatem, ut confirmat à eâ unio Divinitatis constabiliatur, quemadmodum negatâ concutitur (a). Ad illud verò hæreticorum effugium, quod Ethnici negent resurrectionem mortuorum, graviter hoc reponit, (b) Dum Christianus tibi videris, alius ab Ethnico es, redde illi suos sensus, quia nec ille de tuis instruitur: Quid cæco duci inniteris, si vides? quid vestiris à nudo, si Christum induisti? quid alieno uteris clypeo si ab Apostolo armatus es? ille (Ethnicus) potius à te discat carnis resurrectionem confiteri, quàm tu ab illo diffiteri.

Quod

(a) Tertull. c. 2.
(b) cap. 3.